

Ev keleh, Keleha Meyafarqînê!

Rojen Barnas

Ev keleh, keleha Meyafarqînê!
Ne kitêb salix didin, ne tarîx
Ku kê çêkiriye û kengê.
Lê malavayê endazer endazê wê
Wek nexşê destkariya keçeke bengî
Honandiyê ji xewnê, ji hêvî û xeyalan
Ji dilê sotî
Kêşaye bi rastekê,
Bi pergal û mêzînê.
Û hosta
Hîmê wê bi dilovanî
Daniye li ser xerca evînê.
Martyropolis,
Tigranokerta,
Meyafariqîn
Û îro jî
Şarê Silîva
Ev keleh, keleha Meyafarqînê !
Gava Roja me derdikeve ji hêla
Zêwetirkê
Berê xwe dide birca Zembîlfiroş
Birc û barûyên hêkerengî
Şewqa wê davêje Kevanê Qîrê
di rasera girê di Tilmînê.
Di şevên şeverêş de ji dûrî ve
diçilwile
Ku meriv li rê be an rêwî be
Winda nebe
Da bikare xwe bighîne.
Ev keleh, keleha Meyafarqînê !
Serbajarê Dîkran û Badê Dostik
Ku Qabil û Habîl hevhez li vê der
Û ehlên cî
Fileh û misilman digel hev
Olperest û hişaza di nav hev de
Di şahî û di şîne
Jîn heta demekê bi hezarên salan
Dûr bûn ji fikara bêbextiyê,
Neyartiyê,
Xeyb û nefrînê.
Ev keleh, keleha Meyafarqînê !
Têr nabim ji temaşa

Tavehîva çardeşevî li raserê spîndara
Li biniya kanya Xulo
Li tanga aşa.
Û têr nabim
Ji seyranê,
Ji dînê,
Ji hêla Çemê Hesengebê
Liserê van kaşa...
Û dil şabaşa şahiyê dike
Gava keç û bûk derdikevin çixariyê d'
serê gulanan
Li Kanya Navîn, li Kanya Mezin
Şahî û stran û dîlan bi gerdûnê dikeve
Hunê bêjin qey
Badê Dostik
Ji Narikê, ji Elbatê dê niha bê
Û ew jî çûne pêrgînê.
Ev keleh, keleha Meyafarqînê!
Di xew re çûm gava din
Di temaşê de,
Li vê derê, li ber şikefta Kerîm
Li pozê rasta Circîs pêxember
Min xewnek bi ecêb dît
Kes ji we tune gelo xewna min
bigerîne
Li ser xêrê,
Bi şahiyê,
Mizgînê.
Peşkek peşkilî ji nişka ve
Peşka Habîl û Qabil ya nebixêr:
Dest derdiketin
Bê laş...
Ne serî xuya bûn, ne pê
Û zeriya Gul Xatûnê.
Û nehêlin çira zenûn be;
Li hêviyê,
Li xweziyê,
Li jînê.

* Ji Rojname "Mehnamê" hejmar 83, sala 2007ê
hatiye wergirtin.